

# INUIT ATAQATIGIIT

## Inatsisartuni



Aasiaat, 23. januar 2017

Inatsisartut suleriaasianni § 37 naapertorlugu Naalakkersuisunut imaattunik apeqqute-qarpunga:

1. Nunatsinni nipilersukkani immiussat tamakkiisumik internetikkut downloaderinikkut, streamerinikkut tusarnaarneqartartut aamma videonngorlugit isiginnaarneqartartut giga/terabyte-inngorlugu siammarterneqartuni Tele Greenland A/S-imiit nalunaarsorneqarsimappat?
  - a. Nalunaarsorneqarsimappata qanoq annertutigisumik atorneqarsimappat?
  - b. Nalunaarsorneqanngippata Naalakkersuisut qanoq iliuseqarusuppat piginneqqaartussaataitaasutut inatsit malillugu suliallit suliaat internetikkut siammarterneqartut naatsorsorneqaleqqullugit?
2. Nunatsinni atuakkiat tamakkiisumik internetikkut downloaderinikkut siammarterneqartut giga/terabyte-inngorlugu annertussusaa Tele Greenland A/S-ip nalunaarsorneqarsimappat?
  - a. Nalunaarsorneqarsimappata qanoq annertutigisumik atorneqarsimappat?
  - b. Nalunaarsorneqanngippata Naalakkersuisut qanoq iliuseqarusuppat piginneqqaartussaataitaasutut inatsit malillugu suliallit suliaat internetikkut siammarterneqartut naatsorsorneqaleqqullugit?
3. Nunatsinni filmiliat tamakkiisumik internetikkut downloaderinikkut streamerinikkullu siammartikkani giga/terabyte-inngorlugu annertussusaa Tele Greenland A/S-ip nalunaarsorneqarsimappat?
  - a. Nalunaarsorneqarsimappata qanoq annertutigisumik atorneqarsimappat?
  - b. Nalunaarsorneqanngippata Naalakkersuisut qanoq iliuseqarusuppat piginneqqaartussaataitaasutut inatsit malillugu suliallit suliaat internetikkut siammarterneqartut naatsorsorneqaleqqullugit?
4. Aggvaqatigiisillugu nunatsinni internetikkut Mb ataaseq qanoq naleqarpa?
5. Nittartakkat unioqqutitsillutik nipilersukkanik nunatsinni immiussaasunik akeqanngitsumik siammarterisartut (pirathjemmeside) malersorneqarnissaat unitsinneqarnissaallu Naalakkersuisuniit qanoq iliuseqarniarpat?

(Inatsisartuni ilaasortaq Peter Olsen, Inuit Ataqatigiit)

### **Tungavilersuut**

Nunani tamani eqqumiitsulianik siammarterinikkullu pissutsit allanngornikuunerat internet aamma atortorissaaruteqarnikkut nutaaliortuarnermik sunnerneqarlutik ilungersunartumik kinguneqarsimavoq. Suliffeqarfiit, siammarteriviit eqqumiitsuliornikkullu suliaqartut amerlasuut artukkerneqarlutik unissimalereerput suliap annertuup naleerukkiartorsimaneranik kinguneqarmat.

Eqqumiitsuliortuttatta internet ajoqutigiinnarnagu periarfissatut atulernissaanut siunertaqarluta paasissutissanik maanna ujartuivugut, tassami eqqumiitsuliortut allallu

pinngorartitsisut piginneqqaartussaataasutut inatsimmik illersugaanerat siunertaminut naapertuuttumik atulertariaqarmat. Pingaartumillu nunami ikittunnguanik innuttaasulimmi pisortaniit politikikkullu illersorneqarlutik piujuartinneqartariaqarput.

Tele Greenland A/S uani apeqqummi qitiulluinnarpoq tassaammat nunatsinni internetimik siammarterisoq atuutsitsisorlu. Tassaallunilu ukiuni qulini kingullerni atuakkiortut, erinniortut, filmiortullu isertitarisarsimasaannik ineriartorneq malillugu iluanaaruteqartalersimasoq. Tele Greenland A/S tassaavorlu paasisutissanik pigisalik.

Kissaatigaara apeqquteqaatima ullut qulit qaanngiutsinnagit akineqarnissaa